

Berthou Yves (Alc'houeder Treger) Pleuvihan 1861 – Pleuvihan 1933).

Nominoe, Roue Meur Breiz¹ (1903).

Modernnaet eo bet an doare-skriva. Reizet ez eus bet meur a gemmadur. Ober a ra gand “pehini” ha “pere” evel ma veze greet en amzer-ze gand an oll skrivagnerien, diwar skwer ar galleg. Meur a vi-koukoug a zo er skrid orin.

E-keñver istor, lenn “Nominoé” war Google, ha leor Louis Eelegoet “Istor Breizh”, pajenn 55. Ne oe jamez Nominoe Roue Breiz. Eur vojenn “nasionalist” a zo kontet gand Berthou.

Nominoe, Roue Meur Breiz

Goude maro Morvan Lez-Breiz, Louiz kenta, mab da Jerlemagn, a lakaas Nominoe da rena en Breiz evel letanant² dezañ. Nominoe, pehini a ziskenne dezuz koz rouanez³ ar vro, ‘oa eun den a spered braz hag eur brezelour dimeuz ar gwella. Servijet e-nevoa, dindan an Impalaer koz evel jeneral.

Ar Vretoned n’o-devoa ket meur a fiziañs ennañ, dre ma oa lakeet en karg gand impalaer Bro-Hall, o enebour, ha dre ze e halvjont, evel roue Breiz, Gwignavrac’h⁴, Beskont Leon. Mez kabiteded Louiz kenta, pere ‘oa demdost da Vreiz, a deuas gand o armeou hag a drehas war ar Vretoned.

An Impalaer a halvas Gwignavrac’h d’e balez hag a bardonas dezañ ; mez adaleg distroet d’e vro, ar priñs breton a zavas adarre tud a vrezel hag a redas, gwaz ‘vid biskoaz, war mignoned Louiz kenta.

Ar Hont Lambert ‘erruas d’o zikour hag a zeuas a-benn da laza Gwignavrac’h.

D’ar houlz-se an Normaned a ziskenne dre-oll war broiou ribl ar mor. Kêr ar Yeoded, e-kichenn Lannuon, pehini ‘oa eur gêr vraz, ‘oa en dismantr dindan al laeron-vor-mañ. Nominoe a yeas a-dal deze gand e zoudarded, mez ar holl a vanas kement en eil tu evel egile. Koulskoude an Normaned, goude beza prenet boued⁵, a bignas war o listri hag a guitaas ar vro.

Impalaer Bro-Hall ‘nevoa meur a reuz dre leh all hag a leze ar Vretoned da alani. Ar re-mañ ‘gемeras an digarez-se evid kinniga ar gurunenn a roue Breiz da Nominoe, rag beza o-devoa meur a hrad dezañ, ha meur a fiziañs o-devoa lakeet ennañ goude ma ‘nevoa gwallgaset an Normaned war ar mor.

Ar maro skoas an Impalaer gall en amzer-ze. E vugale, evid lodenni o danvez, n’erruent ket da ‘n em glevet. Tra-walh o-devoa d’ober etreze.

Nominoe ne chomas ket da hoari. Bounta ‘reas ar Hallaoued e-mêz ar vro, terri ‘reas lezennou Jarlez Veur, troha ‘reas oll uhalou Breiz, ha rei a reas dezi he librentez evel gwechall. Adsevel ‘reas ivez mogeriou ar hestell, ha lakad ‘reas enne e zoudarded.

E labour ‘oa êzetaet dezañ dre ma oa brezel heb diwez etre daou vab an Impalaer maro, Jarlez-ar-Moal ha Louiz-ar-Jermaneg. Ar hont Lambert, pehini ‘oa mestr war

¹ Nominoe, Roue Meur Breiz : Kurunennet e oa bet ar skrid-se gand “Union Régionaliste Bretonne” e Lezneven e 1903.

² letanant : missus imperatoris.

³ koz rouanez : kentoh “rouanez koz”.

⁴ Gwignavrac’h : Gwioñvarc’h, hervez Eelegoet.

⁵ goude beza prenet boued : iskiz a-berz laeron !

gêr an Naoned, 'roas dorn da Nominoe, hag o-daou e rojont eul las da dud ar roue Jarlez pere 'oa dindan urz ar Hont Renaud.

Hogen Lambert ne gavas ket 'oa greet tra-walh a stad dioutañ ; c'hoant e-nevoa da veza lakeet perhenn war an Naoned ; evid-se e houlennas sikour digand an Normaned. Ar re-mañ a zeuas eta d'an Naoned, war o bagou, hag a zeuas buan a-benn diouti, hep poan, rag ne oa mestr ebed evid he difenn.. Distruja 'rejont ar mogeriou hag ar manati ; laza 'rejont an eskob, ar veleien hag ar veneh, ha lakaad 'rejont ar vro dre-oll en tan hag en gwall. Lambert 'n em gavas neuze mestr rik d'an Naoned.

Goude meur a drubuill, bugale Louiz kenta a zeuas d'en em gleved. Jarlez-ar-Moal en-devoa bet Bro-Hall evid e lodenn ; mez ne oa ket tra-walh evitañ : felloud 'ree c'hoaz dezañ kaoud ivez Breiz ; ha setu-eñ o tond, e penn d'eur bern braz a dud a vrezel. Hogen roue Breiz, Nominoe, 'oa war evez. Mond a reas, gand e oll nerz, renet gantañ e-unan ha gand e niz Salaun, mab d'e vreur Rivallon, a-dal d'ar roue Frank. Dond a reas a-benn da zrailla arme ar Hallaoued etre ar Mans ha Chartres, pe c'hoaz, hervez 'lavarer ivez, war zouarou Redon.

Goude an taol kaer-ze, ar Vretoned, en despet da dud ar roue Jarlez, a ree brezel dre-oll er broiou nesa da Vreiz. Ar hont Lambert, pehini n'halle ket chom en peuh, a rankas kuitaad an Naoned dirag gourdrouz Nominoe. Merevl 'reas, hebdale, en eul leandi merhed, e-kichenn e hoar, pehini 'oa leanez eno.

Eun nebeud bloaveziou goude, roue Breiz hag e arme a dremenas ster al Loire hag a gastias ar broiou 'zo stlabezet en tu all. Se 'reas kemend a boan-galon d'ar roue Jarlez, ken e teuas gand eun niver braz a zoudarded evid stourm ouz roue Breiz. Mez hemañ, eur wech all, a hounezas c'hoaz an treh.

Neuze Nominoe, o weled pegen nerzuz 'oa erru, ha penaoz n'en-nevoa ket ken da gaoud aon rag ar Hallaoued, a zoñjas 'n em gurunenni dirag ar Bed, evel rouanez Bro-Hall. Lidou kaer-meurbed, en enor da gemend-mañ, a zavas en kêr Dol, er bloavez 824, dirag eur bobl deuz ar vrasa, leun a joa ha karget a anaoudegez evid eun den a gemend a isign⁶ vad hag a skiant, pehini 'nevoa saveteet Breiz a-nevez, roet dezi eur splannder ken kaer, ha lakeet anezi da veza doujet gand heh enebourien.

Nominoe a grouas eun arheskopti en kêr Dol, pehini 'dlee kaoud dindan e urz oll eskoptier Breiz. Eskob an Naoned, anvet Aktar, ne blijas ket dezañ an urz nevez, hag a zougas klemm d'ar roue gall. Hemañ 'anaveze penaoz ne oa ket brao kaoud kasoni Nominoe, ne gavas mann gwelloc'h eged rei eskopti Chartres d'an eskob didronet, evid e zigoll.

Sant Konvoyon 'oa d'an amzer-ze tad manah e leandi Redon. Ar vrud dimeuz e vuhez fur ha dimeuz e vuzudou a nije dre-oll. Ar roue Nominoe a gemeras ali digantañ meur a wech hag hen selaoue evel eun den sklêrijennet gand Doue e-unan.

Sant Konvoyon 'n em glemmas dimeuz eun nebeud eskibien pere n'o-devoa ket eur vuhez reiz hag eeun, dimeuz eskob Gwened, dreist-oll. Ar roue Nominoe a zegemennas aneze dirag eur strollad eskibien vad, doktored deuz an Iliz, ha tud ouizieg war al lezennou ; mez an ali a drehas a lavare penaoz 'oa red d'ar pab e-unan rei ar varn war gement-mañ.

Nominoe a gasas Konvoyon da Rom en e leh, evid breutaad 'eneb d'an eskibien. War an heveleb tro e tlee rei d'an Tad Santel, Leon IV, eur gurunenn aour a-berz roue

⁶ isign : ? Deuz ar galleg "insigne".

Breiz, en eur houlen digantañ kaoud ar vadelez da zisklêria dre-oll 'oa Nominoe ar gwir roue war Breiz. Beza 'oa gantañ, d'e heul, daou-ugent dijentil dimeuz ar furra, pere a bokas da dreid ar pab, a-berz o mistr. Sant Konvoyon a reas eur vreutadenn helavar, er yez latin : « Deut on, emezañ, o ! Tad Santel, da rei deoh eun testeni a zentidigez en ho keñver, a-berz an Trehour braz, ar roue gallouduz 'zo o ren war ma bro. Setu amañ, kinniget deoh gantañ, eur gurunenn aour, kizellet gand ijin gaer, ha steredennet gand mein kaer deuz ar vrasa dalvoudegez. Ho madelez, d'he zro, mar plij ganti, a roio da Vreiz, d'he Roue ha d'he fobl, eur merk dimeuz he harantez ha dimeuz ar stad vad a ra diouzim, en eur rei relegou benniget eur zant bennag, pere a lako war Breiz diwall an Aotrou Doue. »

Goude-ze, Sant Konvoyon a zisplegas d'ar pab ar hlemmou 'nevoa d'ober diwar-benn an eskibien, hag ober a reas dezañ al le ma n'en-nevoa e gwel nemed mad an Iliz ha mad e vro.

Ar pab, goude beza benniget Konvoyon hag e dud, a roas dezañ penn Sant Marsilin, pab, pehini 'oa bet merzeriet en Rom dindan ren an impalaer Dioklesian. Mez war pez a zelle an eskibien, ar pab ne reas ket a van dimeuz klemmou Nominoe ; ne roas ket ouspenn an testeni a houlenne ar roue diwar-benn e gurunneniaj.

Kement-se 'roas keuz da Nominoe da veza kaset Sant Konvoyon da Rom : ne reas ken goude nemed dre e benn e-unan. Ober a reas e Redon eur hendalh dimeuz a guzulierien, pehini a varnas an eskibien evid ar wech diweza. Ar re-mañ, buan, a dehas da Vro-Hall, daved Jarlez-ar-Moal.

Mez ar Roue Jarlez a dlee paea ker an degemer roet gantañ d'an dud-se. Nominoe 'zavas e armeou hag a dremenas war broiou ar Poitou hag ar Maine evel eur barravel euzuz. En eur lakaad an dismantr war e hent eh erruas dirag kêr Poitiers. Roue Bro-Hall, fuloret, a zastumas buan daou-ugent mil soudard hag a redas war-lerh Nominoe pehini a dehe goustadig gand eur bern madou skrapet.

Roue Breiz n'e-nevoa nemed ugent mil soudard, archerien war droad ha war varh, mez pep hini 'reas e zever evel m'eo dleet. En arme Jarlez 'oa eur bagad Saozon pere a ree dezi ar peurvuia dimeuz he nerz ; mez o benviou brezel 'oa kalz re bounner. Ar Vretoned o-devoa kezeg hag armou skañv, ha dre-ze e nijent en-dro d'ar Zaozon en eur skei reud hag eeun, hag heb tapoud gwall ebed. Ar Zaozon a spontas buan hag a droas o hein. Ar Vretoned a heulias aneze kement ha ken bihan, o vounta houarn en o hig, ken na chomas ket eur Zaoz nag eur marh, heb beza gouliet. Beteg an noz teñval e padas an emgann, hag ugent mil soudard da Jarlez-ar-Moal a vanas an deiz-se war al leur vrezel. An deiz war-lerh, deuz ar beure, ar Vretoned a lammas adarre war ar Hallaoued gand kemend a dan hag a nerz, ken e weled ar re-mañ o redeg, penngollet evel eur bagad deñved. An emgann n'echuas adarre nemed gand an noz ha pa 'nevoa gallet enebourien ar Vretoned mond en diwall en o hamp.

En e hlahar braz, ar roue Jarlez a gollas e benn : e-pad an noz e kuitas e arme hag e redas gand ar foeltr da Bariz. An deiz war-lerh, al letananted, o weled kollet ar Roue, a gemeras pep hini an teh, heb lared ger, hag ar zoudarded evelte. Mez ar Vretoned, goude beza dihunet deuz eur housk diskuizuz, o weled ar Frañsizien o redeg evel gedon etrezeg ar parkou, a gouezas warne evel chas kounnaret. En eur huchal a-bouez o fenn, e lakjont o enebourien da beurgoll o skiant. Nebeud a vanas

beo da gas kelou dimeuz ar holl spouronuz-se. Kamp ar Hallaoued 'oa leun a binvidigez. Ar Vretoned a zistroas d'ar gêr, sammet gand madou ar Roue Jarlez.

Goude eun treh ken braz, Nominoe 'welas e vrud o redeg d'ar broiou pella ; beva 'reas en peuh beteg e varo. E blijadur vrasa 'oa komz gand Sant Konvoyon, en abati Redon, ha selaou e brezegennou kaer. Sevel 'reas eun abati all en-kichenn Dinan, en Lehoñ, en pehini 'reas degas, deuz enezenn Jerzey, relegou Sant Magloar, koz arheskob⁷ Dol ; ober a reas ivez sevel korv Sant Gwennael 'barz manati Landevenneg, evid hen lakaad en eun arched alaouret.

Ober a reas c'hoaz eun taol kaer a-raog mervel : kêr Angers 'oa gouarnet gand an Normaned ; Nominoe o stlabezas e-mêz ar vro-ze ; ha kent distrei da Vreiz, 'savas taillou war broiou an Anjou, an Touraine ha Vendôme.

War-dro ar bloavez 851 e varvas ar Roue braz-mañ, pehini adroas da Vreiz heh enor hag he librenteou, en eur ziframma ar habestr lakeet dezi gand an Impalaer Jarlemagn.

Nominoe eo ar henta Roue 'nefe renet war oll zouarou Breiz ; a-raog, Breiz 'oa rannet etre eun nebeud konted. Nominoe e-neus bet an enor braz da lakaad Breiz Vihan da drehi war Vro-Hall.

Galloud 'reom-ni lavaroud eo brasa Roue he-deus bet or bro, evel ma'z eo ivez Tad or Broadelez.

Dleoud 'reom hirie, en despet d'ar bell-amzer, selloud outañ evel ouz eun tad. E skeudenn a zav bepred er pellder, evel hini unan deuz an dud vrasa 'zo bet war ar Bed.

Enor, karantez, doujañs da Nominoe, Roue Bretoned an Arvor ! Breiz da virviken !

Erwan Berthou

⁷ koz arheskob : arhesbob koz.